

(Ihaia 31.14 ki 37.) Kaore tatou i te kuare ki nga whakaware o roto o tatou ngakau. Ko te rongoa a Hetekia te rongoa mo tatou. Kia mau ki te inoi.

Ko nga whakamarama i runga ake nei te ki, e puare mai ai ki a tatou etahi o nga akoranga o ia Ratapu o ia Ratapu. Ki te mau i a tatou enei akoranga katahi ka rite i a tatou te mihi o te tau e ki nei:—

“ MERE KIRIHIMETE HAPI NU IA.”



TE WIREMU KARUWHA.—No te tau 1823 ka u mai ki Nui Tireni tenei kaumatua mana nui i roto i te Iwi Maori, ara a Henare Wiremu. He tuatahi note kite o te Maori i tenei mea i te mowhiti e mau mai ana i a Te Wiremu ka tapaina e ratou tona ingoa ko Te Wiremu Karuwha! Kei te tau e takoto mai nei 1923 ka eke te rau tau o te taenga mai o te tupuna tuatahi o tenei whanau rongo nui, o te hapu pakeha i piri pono ki te Iwi Maori a tae noa mai ki tenei ra. Kaore he whanau pakeha i penei te kaha ki te awhina haere i te Iwi Maori me te kaha o Ngati Wiremu. He mea nui tenei mea te hurihanga o te rau-tau. He aha te whakamaharatanga ma tatou ma te Iwi Maori mo tenei hurihanga o te rau-tau? He take pai tenei hei whiriwhiri ma tatou i a tatou hui Kirihimete me te Nu Ia.



NGA PEPA KEI TE HOKI MAI.—He nui tonu nga pepa e whakahokia mai ana ki te tari o Te Toa Takitini, he kore kaore i tikina atu e te hunga ki a ratou aua pepa i o ratou poutapeta. Ki te takoto noa te pepa mo nga wiki e rua, kua whakahokia mai ke Heretaunga nei. Ki te haere koutou ki tetahi wahi ki noho ai, me whakaatu ki te poutapeta, kia puritia ranei to pepa, kia tukuna atu ranei ki te wahi e noho ai koe.